

Akerliussutsimik takutitsinissamut tikilluaqqusineq

Haalip eqqaani naapinneq/ingerlaaqatigiinneq

- Tikilluaritsi, ugguuna ingerlaassuugut: Haali, pisiffik, jysk, Kommune/orpiup toqqaviata nalaanut.
- Akerliussutsimik takutitsineq ataqqinninnermik pissuserissaarnermillu ingerlanneqarnissaa kissaatigaarput.
- Sumunnarfissatsinnut pigutta oqaaseqarusuttut oqaaseqarnissaannik tikilluaqqussuugut.
- Aallarpugut.

Kommunep saavani

- Tikilluaqqusineq, akerliussutsimik takutitsinerup siunertaanik oqaaseqarneq.

Kommune Qeqertalimmi innuttaasut avataaniillu peqataasusi tamassi tikilluaritsi. Siullermik qujanaq akerliussutsimik takutitsinissatsinnut tapersuisunut tamatsinnut isumaqartorujussuuvoq.

Akerliussutsimik takutitsinissarput aaliangiussimavarput paasissutissat ersarilluinnartut saqqummertarnerisigut qisuariartoqarnissaanut utaqqiinnarsinnaajunnaaratta, kingornalu qanoq kinguneqarsinnaanerani ernumalluta akerliussutsimik takutitsinissaq pilersaaruseriorlugu aallartissimavarput.

Illoqarfitsinni nunaqarfitsinnilu amerlasuujusugut ernumanermik eqqorneqarpugut, siunissarput massakullu inuunerput eqqarsaatigalugu.

Taamaattumik piaartumik tusaaneqarusuppugut akissutiserusullutalu. Isumaqarpugullu toqqaannaq eqqugaasussat akissutisinissaminnik pisariaqartitsilluinnartut.

Kommuneni allani aningaasaliissutitigut Kommune Qeqertalimmi assigiinngitsitsisoqarnera isiginngitsuusaarsinnaanngilarput. Assersuutitut taasinnaavagut; Aasianni timiusiorfik Tusass Pisiniarfik matunikuupput, ernisarfeqanngilagut, aaliangersimasumik kingutilerisoqanngilagut.

Uffa qitiusumik napparsimaveqarluta ilinniartoqarfiulluta talittarfissuaqarluta mittarfeqarlutalu, periarfissangissaarnerusariaqaraluarpuq Kommunitisinni illoqarfiit nunaqarfillu kivitseqatigerusullugit! Ineriartuutigisinnaasatsinnut assersuutitut ilaavoq Ilulissani mittarfissuaqalernissaa.

Ukiut tamaasa Polar Raajat illoqarfitsinni kiffartuussinerit 28,5 mio. nalinganut pisisarput. Assersuutigalugu; ikkumatissaq, eqqiaatitsineq/errorsititsineq, assartuititsineq, usingiaatitsineq, sulisunut nerisaqartitsineq. Polar Raajani sulisut ukiumut kommunetsinnut skatsimut 7,8 mio. nalinganut akiliisarput. Assersuutigalugu; atuarfinnut, illoqarfitsinni nunaqarfinnilu aserfallatsaaliinernut, aqquserniornernut assigisaanullu atorneqartarput.

Illimagineqarsinnaavoq Polar Raajat matunerata kingunerani suliffippassuit 130 tungaanut amerlanerusulluunniit annaaneqartussaasut. Malittaaniillu uagut illoqarfitsinni nunaqarfinnilu sullissisuusugut eqqungaaqataasussaavugut, kisitsit taasakka (28,5 mio / 7,8 mio / 130 stk) aningaasanik illoqarfitsinni nunaqarfinnilu kaaviaartitseqataammata.

Taassuma saniatigut Kommune Qeqertalimmi naattorsuutigineqarpoq 20 mio. ikinnerunngittunik ikiorsiissutit tunniunneqartariaqalissasut suliffeqarfiit 130 amerlanerusulluunniit annaaneqassangaluarpata.

Uagut illoqarfitsinni nunaqarfitsinnilu Polar Raajat pisariaqartilluinnarparput suliffissaqarniarneq ataavartoq ingerlatiinnaqqullugu aammalu Kalaallit Nunaanni ineriartortitseqataarusuppugut. Tusaatigut! Politikerit nunatsinni iliuuseqarnissarsi utaqqiinnarparput.

Kommune peqqittoq tassaavoq Kommune ineriartortoq.